

# Mokanda nwa Polo nwa ntubo oka Timote Maphoo ma etatele

Ango wa Timote abaka Moela, nyango abaka Moyuda owa butwa moklisto. Polo avanaka na Timote pho ya mbala eya ntubo o mokyisi na nkombo Listre (Bitoma 16.1-4), mena yabaka o imbanga sa Polo sa ibale. Kobanda wawana, Timote abutwaka monomo baabaka bakye mitambula na Polo o mabanga me maikye ma iimola simo elaa.

## **Mokanda mumu mowole maphoo manene maato:**

- 1 Timote 1.1-20; 4.1-5: Polo kakyebisa Timote pho ya mateya ma bole, na maphoo makyekyi mibeko ma Bayuda na bato batebali bayuda
- 1 Timote 2-3: Polo kapha Timote molongo nwa ibongya losambo, na mofesi mosengyesi iba na bakambi ba Ingomba
- 1 Timote 4.6-6.21: Polo katya Timote ndengye esengyesi yo ikyela etoma ye onte ya baanosi, pho abe awaakolo moto wa etoma wa Yesu Klisto

O mokanda nwe, Polo kaongye na banga obokye banga satosaka nde mibeko ma Ingomba na bakambi ba sango, kasi tobe na sakolo ianola pho yaikumola Yesu Klisto, mobikye wa banga (2.3-6).

### *Polo kabeya Timote*

<sup>1</sup> Nga Polo, toma wa Yesu Klisto, pho ya ndingyisa ya Nwaphongo Mobikye wa banga na Yesu Klisto molemo nwa banga, <sup>2</sup> oka we Timote, owakolo nwana wa nga o ianola, naekomele obokye: Ngolu, ngongo, bose pha Tata Nwaphongo na pha Yesu Klisto Nkolo wa banga ibe na we.

### *Bateye ba bole*

<sup>3</sup> Bo wawoko nga na we imbele sa kyekye nga o Makedoniya, ba o Efese pho ya ikatela bato baayoko bee sateya mateya maa bole. <sup>4</sup> Obakatele bee samiambya o bikoo ba pha na itondoloko mabota saunva. Maphoo mamana mabote nde miko kasi nwango nwa Nwaphongo phe, mookokysisame onte ya ianola. <sup>5</sup> Ntina ya motindo me eli lozingo looute o ndondo elaa, na maumunya malaa na ianola sa phele. <sup>6</sup> Pho ya iba sabenga nzela eye, bato bayoko babungyi nzela, babengi bowole bowole phaaazanga ntina. <sup>7</sup> Bamitate iba bateye ba mibeko, nzuka tebaebe naa maphoo mawo bee naa maphoo mateya be.

### *Eyaakolo ntina ya mobeko*

<sup>8</sup> Pho toebe obokye mobeko ali molaa bo moto kamokyelele ndokolo mobeko. <sup>9</sup> Pho, toebe na bolaa bobo: Mobeko temoli pho ya moto o molaa, kasi pho ya bato baatebatosa na batombi, bato babe na bato ba masumu, baatebakumole Nwaphongo ebe na mbolo iisantu, babomi ba bato, ebe ba ango ebe ba nyango, <sup>10</sup> baakyele bondumba, baalale na bebi na bee bampele,

baaungye ba baombo, bakati ba bōle, baakate seleka ya bōle, na maphōo maso maatemele mateya ma phele. <sup>11</sup> Mateya me eli Simo Elaa ya nkyemo ya Nwaphongo owa ngambo eya mpe bēe pho naebanza.

*Polo aphe melesi pho ya ngongo ya Klisto*

<sup>12</sup> Naphe melesi na owampe bokusi, Yesu Klisto Nkolo wa banga: Eli yo moto owa wene obokye nakokyi amba nkpa o etoma ye, <sup>13</sup> nga owabaka phanza motiyosi, munyokosi na moto wa nkamba. Kasi anzokyela ngongo pho nakyelaka saeba ntina, na izanga ianola. <sup>14</sup> Phele, ngolu ya Nkolo wa banga, ebe na ianola, na lozingo looli onte ya Yesu Klisto yatonda mi nga.

<sup>15</sup> Ioba sisi sili sa phele, sikokyi ianolama na bato baso obokye Yesu Klisto aya o mokyisi pho ya ibikya bato ba masumu boli nga, inga moto owa o boo. <sup>16</sup> Kasi bo anzokyelaka ngongo, eli pho ya obokye oka nga, moto owa o boo, Yesu Klisto ateya ndondo ye elaa, ndokolo ndakyisa pho ya bato bamoanolela, pho ya bomoo pha bobele.

<sup>17</sup> Oka mokonzi owa bobele,  
Nwaphongo ooli nde yo monomo, ootowe,  
ootowenene,  
ngambo na nkyemo  
pho ya bobele na bobele. Ame.

*Ijwana ebasi elaa*

<sup>18</sup> Timote, ijwana wa nga, kyeka mobeko moephe nga, ikokana na noko ya baimosi baakalakala pho ya we. Noko me ibe bokusi pha we o ebasi elaa ekye ijwane we; <sup>19</sup> na ianola

na maumunya malaa. Bato baayoko balekye ikyela babona, emba bamba zinza ianola sa be. <sup>20</sup> Onte ya bee wamozwa Imene na Alegizandre, na baambya oka Zabulu, pho baekole iba sakula tiyola Nwaphongo.

## 2

### *Mateya pho ya ibondela*

<sup>1</sup> Naongye na bee obokye o boo pha maphoo maso, nde koongye, nde kobondela, nde konyingonele, nde kophe mlesi, pho ya bato baso.

<sup>2</sup> Pho ya bakonzi na baaloangyele, pho tobe bose na ikyela maphoo malaa na ma kaa. <sup>3</sup> Kyeka maphoo malaa na masepelisa Nwaphongo Mbikye wa banga, <sup>4</sup> okozingye obokye bato baso babikye emba baebe bosembo.

<sup>5</sup> Pho Nwaphongo ali nde yo monomo, na mobongye ali nde yo monomo onte ya Nwaphongo na bato, moto monomo: Yesu Klisto,

<sup>6</sup> owa miambya pho ya iikola bato baso.

Mena eli Simo eya imola bee o imbele sa mekama, <sup>7</sup> na pho ya simo me nakyelamaka na nga owakolo toma, na wo nde phele, siikate, nga nali nganga mayele wa nkyisi onte ya ianola na onte ya bosembo.

### *Bampele na babasi o losambo*

<sup>8</sup> Nazingyi obokye bampele babondela o bilele biso, batombe maboko masantu o ikolo, sa kabu na na bookaaa.

<sup>9</sup> Pho ya babasi, balate molato molongofo, bee sa lekyinya ndelo: Naa na itonga suwe, naa na

bayaka ba wolo, naa na mbongyesi ya motuya.  
<sup>10</sup> Kasi balate nde bitoma bilaa, bolongoɓaa na babasi bakyele etoma ya bosembo.

<sup>11</sup> Imbele sa mateya, nwanwasi asengyesi ikala bose na imiuya siso. <sup>12</sup> Nga, siiphe nzela obokye nwanwasi kateya na aangyele lele. Aikale bose.  
<sup>13</sup> Eli nde Adama owa kyeka bee phanza. Ewa sima. <sup>14</sup> Emba teli Adama owa kosaka be, kasi eli nwanwasi owa kosama, amba buka mibeko.  
<sup>15</sup> Na bo ebe bomo, nwanwasi amobika na ibota se, kasi ambe nde banza ianola, lozingo na bosantu phe sa mawala.

### 3

#### *Bakambi ba ingomba*

<sup>1</sup> Lowo loowo nga lolo loli nde phele: Bo moto ali na phowa ya iba mokambi, mena kazingye etoma eli elaa. <sup>2</sup> Mokambi nwa ingomba, yo sa ba moto wa maphoo mabe obokye bato bamooya, lele wa nwanwasi monomo, yo sa ba moto wa lootu, abe na maumunya malaa, mobesi molaa, kayambe babutu, akokye na iteya,  
<sup>3</sup> yo sa ba munwe nwa maleku, sa ba munwani nwa bibasi, kasi moto wa bonyile, yo sa ba moto wa maoka, na moto wa phowa enene ya baphalanga, <sup>4</sup> aebe ikamba ingambi se ambe na teya bana bee imiuya na kaa eso: <sup>5</sup> Bo moto taakokye ikamba ingambi se mampenza, amba koka ibongya ingomba sa Nwaphongo ndengye'ye? <sup>6</sup> Kasi yango sa ba moto naino otookoki o ianola, pho yo sa kaa, bo mawala mamozibi miyo, o mazengye mabekya Molembe.

<sup>7</sup> Elaa na obokye bato baate bali baklisto bawoo na bolaa pho yee, pho yo sa zwa soo, yo saamba na ikaa mbala yoooyo o mazengye ma Molembea.

### *Ba diakre*

<sup>8</sup> Ba diakre nde bomoo me, basengyesi iba bato ba kaa, basengyesi iba nde na ewole yoooyo, bée samiambya o maleku naa na iluka baphalanga na manzela maa soo. <sup>9</sup> Basengyesi ibanza bosembo pha baaweninya ianola sa bée na ndondo yoooyo. <sup>10</sup> Na bée me basengyesi ifameka phanza, emba sima, bo tefabazwe na lowoo loofe, bakokyi imba kyela etoma ya bée ya bo diakre.

<sup>11</sup> Na babasi nde bomoo me, basengyesi iba babasi bakumole be, baate bali na ewole ebe, baate bali na looto, baakokya maloba ma bée o maphoo masoo.

<sup>12</sup> Ba diakre basengyesi ilonga nde nwanwasi monomoo, baangyele mangambi ma bée na bana ba bée na bolaa. <sup>13</sup> Pho baakyele etoma ya diakre na bolaa bazwe ikumo sa bato basoo, na bokusi pha ianola boli na Yesu Klisto.

### *Sekyele eenene*

<sup>14</sup> Naekomele babona na iumunya obokye namoya zwana na we mizele.

<sup>15</sup> Kasi na bo nazimbane, wamoeba nde me imikamba o ingambi sa Nwaphongo, sili ingomba sa Nwaphongo oli na bomoo, ikonzi na iingo ya bosembo. <sup>16</sup> Nde phele, sekyele ya ikumola maphoo ma Nwaphongo eli enene! Yo owamiweninyaka onte ya nzoto, Boloboo amolongya,

baanzelu bamowens,  
bato baate baaebe Nwaphongo baoka simo ye,  
o munse munso bamoanola,  
azwa nkyemo ya Nwaphongo.

## 4

### *Bato baateya mateya ma boole*

<sup>1</sup> Bolobo kawo polele obokye: O imbele sa suka, bato bayoko bamoangana ianola sa be, bamobenga malobo ma bakose na mateya ma malobo mabe, <sup>2</sup> pho ikosa sa banyamabole na isosolo sa bato babana simbo zika. <sup>3</sup> Bamokatela malonga; bamokyisa ntoma iyoko, nzuka Nwaphongo aikyela pho ya obokye baanosi, bee baebe maphoo ma phele, baize, bambe mophe melesi. <sup>4</sup> Pho iso yakyela Nwaphongo ili ndaa, ekpele yonoyo teli ya ile bo topho Nwaphongo melesi o boo pha iye zaa. <sup>5</sup> Pho na Iloba sa Nwaphongo na na ibondesi ibuto peto.

### *Moto wa etoma omolaa wa Yesu Klisto*

<sup>6</sup> Teya bebi maphoo maso mamana: Wa moba moto wa etoma omolaa wa Yesu Klisto, okookye maloba ma ianola na iteya sila sabenga we. <sup>7</sup> Ka pho ya bikoo biibe na bowolebowole pha bakasi bababasi, obile.

Omikuya we mampenza nde o mobesi nwa moto wa Nwaphongo. <sup>8</sup> Pho ikuya sa nzoto sili na ntina mi maphoo makyi, kasi mobesi nwa moto wa Nwaphongo, nwango, moli na ntina o maphoo maso. Nwango moli na mbunu ya bomoo, ya bomoo pha lolo, na ya bomoo pha

moya. <sup>9</sup> Ilofa me sili sa ianola, emba sango siso sikokyi iyambama. <sup>10</sup> Pho bo tookye mpasi na bo tonwane, molemo nwa banga moli mi Nwaphongo oli na bomoo, iyo oli mobikye wa bato baso, konza baanos.

<sup>11</sup> Kyeka isengyesi we iyimola na iteya. <sup>12</sup> Moto satiyola bolengye pha we. Kasi ba ndakyisa pho ya baanos na ewole ya we, na mobesi nwa we, na lozingo la we, na ianola sa we, na na ndondo elaa. <sup>13</sup> Tee nono waamoya nga, omiambya na itanga makomi ma Nwaphongo, na ilenzaka na na iteyaka. <sup>14</sup> Sa langa na ikabo sa ngolu siili onte ya we, sazwa we na munoko nwa baimosi na wa etandela bankumu mafoko. <sup>15</sup> Kyeka losengyesi we ibanza o ndondo ya we. Kyela lowo lowaa o losengyesi we ilendendala. Yango mena bitoma ba we biamowenene o miyo ma bato baso. <sup>16</sup> Kyeba na we mampenza na na mateya ma we. Lendendala i mango. Bo okyesi babona, waamibikya we mampenza, wamobikya na baayokye.

## 5

### *Baanosi bakyses*

<sup>1</sup> Saoya munanga na bokusi, kasi omoteya ndokolo ongo. Ba na banzenga ndokolo banaa nyongo, <sup>2</sup> baphomba baa babasi ndokolo ba nyongo, bangondo ndokolo mankanasa ma we, na bopeto bos.

### *Mazengye*

<sup>3</sup> Kumola mazengye, bali maakolo mazengye. <sup>4</sup> Bo bozengye boli na bana naa na mankoko, eli



nde b́ee basengyesi iteya o boo ianola sa b́ee o mabota ma b́ee mampenza na ibuyisa baboti ba b́ee bolaa. Kyeka maphoo mali malaa o miyo ma Nwaphongo. <sup>5</sup> Pho ya oli owaakolo bozengye, owa ikala nde yo mampenza, molemo nwe nde Nwaphongo kambe na lendendala na moo na mokolo na inyingonelaka na ná mabondesi. <sup>6</sup> Kasi okoumunya nde o bisengo ali mowe, na bo ali na bomoo. <sup>7</sup> Kyeka na isengyesi we ikatela, pho b́ee sazwa mooya. <sup>8</sup> Bo moto taabanza bato b́ee, konza bali ne ingambi sonoso, aoti ianola se, ali mobe koleka na moto otoanole Nwaphongo.

<sup>9</sup> Nwanwasi bamunyosa o molongo nwa mazengye nde bo ali na mambula koleka mako motoba, ambaka zala nde na lele monomo. <sup>10</sup> Esengyesi obokye aebane pho ya bitoma b́ee bilaa: Owa kosa bana, kayambe bato, akunyola makolo ma bato bakyelele Nwaphongo, kasungye bato baanyokolo be, okomiambya o bitoma biso bilaa. <sup>11</sup> Kasi pho ya mazengye ma bangondo, waabamanya. Pho, imbele samooka b́ee maphowa, bamokubolela Klisto lokukyi, bamozinga ikula zala malonga, <sup>12</sup> bamosambisama pho bale ianola sa b́ee saa boo. <sup>13</sup> Oombi kula ba b́ee na sa etoma, bakye mikye tsho tsho o mangambi ma bato, teli nde pho tefali na bitoma, kasi bakuli ba bakyesi ba toko na iwoo maphoo sa mokyito, bawo bowole bowole. <sup>14</sup> Yango mena nazingye obokye mazengye ma bangondo bakule zala malonga, babote bana, babatele mangambi ma b́ee pho banguna ba banga sazwa nzela ya ilo yoo na

bofe. <sup>15</sup> Pho bana baunva bunga nzela, babenga Molemba. <sup>16</sup> Ka bo moanosi owa nwanwasi ali na mazengye o ibota se, abasungye. Te esengyesi obokye babe ephesi ya ingomba, pho ya obokye ingomba asungye nde bali maakolo mazengye.

<sup>17</sup> Bankumu, baakambe etoma na bolaa, basengyesi izwa ngambo elekyi, konza baawene mpasi na etoma ya iyimola na ya iteya simo ya Nwaphongo. <sup>18</sup> Pho Makomi mawo bobo:

Sakanga munoko nwa ngombe waekyelele yango etoma ya mbuma ya ble,

naa:

Moto wa etoma akokyi na iphuti se.

<sup>19</sup> Koanole bo baphundi nkumu nde na noko ya manzoka mabale na maato.

<sup>20</sup> Baakyele masumu, obaoya o miyo ma bato baso, pho bayoko baile me. <sup>21</sup> Naongye na we o miyo ma Nwaphongo na ma Yesu Klisto na ma banze baalo Nwaphongo obokye otosa mitindo mimi sale miyoko, okyele na baso nde ndengye yonyo. <sup>22</sup> Sawelana itandela moto maboko, saangana o masumu ma bato. We mampenza o mibatele obe peto.

<sup>23</sup> Sa nywaka nde maa na maa, kasi nywaka na nwana vinyo pho ya bolosi pha we phaa motema, pho kolobo na okana.

<sup>24</sup> Masumu ma bato bayoko maebane sataa na basambisa, kasi maaka bayoko mambe ya ebana nde sima. <sup>25</sup> Bitoma bilaa na bie biebane nde bomo me, na bitebili bilaa tebikokyi ibombama.

## 6

<sup>1</sup> Bato baso baali baombo, basengyesi ikumolaa ba nkolo ba bee na maphoo maso, pho ya

obokye bée satiyola nkombo ya Nwaphongo ná mateya ma banga. <sup>2</sup> Baali na ba nkolo baanola Nwaphongo, bée sale ibakumola pho ya obokye bali bebi na be. Kasi bakule bakyelela na koleka, pho bali baanola Nwaphongo na bebi ba lozingo, basengyesi na bitoma bilaa ba be.

### *Mateya ma boole*

Kyeka maphoo masengyesi we iteya na ilenza. <sup>3</sup> Bo moto kateya mateya masuu, bo tabengye maloba maphela maaka Nkolo wa banga Yesu Klisto na mateya malongoḁaa na ianola <sup>4</sup> mona lolendo lomozi miyo. Ali moto otoebe ekpele, moto wa bolosi okokyemiluka miko na batoko. Zuwa, maaka, bitoo na maumunya maabe maso maute wawana. <sup>5</sup> Baikye ziko saema, pho maumunya ma bée mali mabe. Bazanga maphoo ma phela, baumunya obokye imiambya o maphoo ma Nwaphongo eli nzela ya izwa ezwele.

### *Eyaakolo ezwele*

<sup>6</sup> Nde phela, eli nzela ya izwa eyaakolo ezwele, imiambya o maphoo ma Nwaphongo, pho ya moto okokyekyele nde iili ne. <sup>7</sup> Pho toloikaka ya na ekpele o mokyisi mumu, nde bomo, tomobutwa maboko pha sa ekpele. <sup>8</sup> Emba bo toli na ntoma na bitobu, mena wekye oka banga wakokyi. <sup>9</sup> Ka pho ya bazingye ibutwa bato ba ezwele, babisa o izengye sa bimekyi, onte ya maphowa mabobubusi na maazanga ntina, maatomisa bato o iwa na o ibunga. <sup>10</sup> Pho phowa ya baphalanga, eli sina ya maphoo maso maabe. Pho ya imiambya mi yango, bato

baayoko babunga itakye na ianola, bamba na nyokolo mokali nwa bée na matungyisi maikye.

*Polo kaphe ndongo ya maphoo*

<sup>11</sup> Pho ya we, moto wa Nwaphongo, lota maphoo mamana. Luka bosembo, imiambya o maphoo ma Nwaphongo, ianola, lozingo, iitala, bonyile. <sup>12</sup> Nwana ebasi elaa ya ianola, zwa bomoo pha bobele na bobele pha ebangaka na be, bo waimola we na bolaa o miyo ma manzoka maikye. <sup>13</sup> Nawo na we o miyo ma Nwaphongo ookophe mbolo iso bomoo, na o boo pha Yesu Klisto owa imolaka na bolaa ianola se o boo pha Poo Pilata: <sup>14</sup> Banza mibeko na iba sa intono siibe na sa mooya, nono waimiweninya sa Nkolo wa banga Yesu Klisto.

<sup>15</sup> Imiweninya me samobaa o imbele saameka Nwaphongo,

moto wa nkyisa na mokonzi nde monomo,  
Mokonzi wa ba bakonzi, na Nkolo wa ba nkolo.

<sup>16</sup> Iyo mampenza etaawe,  
kazale o moo motemokoki bée izwa,  
moto nono monomo naino tamoweni etambe na mowene.

Nkyemo ná mwiya nwa bobele na bobele ibee ne!

Ame.

<sup>17</sup> Oka bato ba ezwele ba mokyisi mumu, wo na bée obokye bée saba na lolendo naa sakyela molemo nwa bée o ezwele eteekoko, kasi bakyele molemo nwa bée nde oka Nwaphongo, yo okolophe mbolo iso na boikye, pho ya obokye tosepele na yango. <sup>18</sup> Wo na bée bakyele bolaa, babe bato ba ezwele ya bitoma bilaa. Babe na

ngolu, babakye na ná bebi. <sup>19</sup> Emba bamobokya pho ya bee mampenza ezwele elaa ná ekyekoko o imbele sa moya, pho ya izwa phaakolo bomoo.

*Ibeya sa suka*

<sup>20</sup> O Timote, banza na bolaa maphoo maso maephe be. Sa nyolo o bowole bowole boobe na miko ma boebakye pha boole. <sup>21</sup> Bato baayoko bawenekye obokye bali na boebakye pha ndengye mena babungyaka ianola sa be.

Le obokye ngolu ebe na we!

## **Sangola Eenyakune**

### **Lobala: Sangola Eenyakune New Testament**

copyright © 2018 Wycliffe Bible Translators, Inc.

Language: (Lobala)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022

45dc5a8e-f513-5ba3-aad6-e48bd1d5b563